



La Stiva da morts sper la baselgia a Vrin ei in dils objects ils pli enconuschents digl architect indigen.

FOTOS MAD



Ils materials indigen han prioritad tier la construcziun dils objects digl architect reconuschiu.

«La concentraziun dat forza»

Premi da cultura grischun pigl architect Gion A. Caminada da Vrin

DA GIUSEP VENZIN / ANR

■ Oz retscheiva igl architect Gion A. Caminada da Vrin il Premi da cultura dil cantun Grischun. Pigl um da 54 onns munta quei ina honur extraordinaria: «Perquei ch'igl ei in premi da cultura e buc in premi d'architettura. Ed igl ei in premi dalla regiun per la regiun.» Igl architect cun biro a Vrin ei professer alla Scuola alta tecnica (ETH). El numna sesez in architect che survecha alla societad. «Igl architect sto tschentar il carstgaun e la cultura el center dallas ponderaziuns.» Ils extremists ein buc tenor il gust digl architect reconuschiu. «Il plaid innovaziun ei in sgar-scheivel plaid. Nus tscherchein maletgs, mo quels van gleiti alla fin. L'innovaziun ei pil pli enzatgei gagliard ch'ins vegn buc da tener sut controlla.» Gion A. Caminada preferescha las nianzas che fan la differenza, preferescha il concentrau e numna il marcau talian Pisa in bien exempel dall'architettura concentrada: «La concentraziun dat forza. Per scaffir differenzas drovi in cert quantum dil medem. Ils baghetgs ein bunamein tuttina e dattan l'identitad che dat la forza.» Igl architect numna era la cadeina da curals sco exempel. «La pli biala cadeina ha curals semeglionts.» Ei dat denton era excepziuns, dat extremists che han sia muntada e Gion A. Caminada numna la baselgia in da quels extremists: «Ella ha ina outra impurtonza el vitg e duei era sediferenziar dils auters baghetgs.» Igl archi-

tect vul sviluppar ils objects tenor lur muntada enteifer il viver dalla societad.

Ina metoda e buc in stil

Gion A. Caminada scaffescha loghens e renunzia al spitachel architectonic. A caschun da siu plaid d'entrada all'ETH ha el constatau: «Viver, patertgar e baghegiar san ins buca sparter.» La veta el mund pign entadem la Lumnezia hagi formau el. A Turitg ha igl architect da Vrin l'obligaziun da formar ils students d'architettura. «Jeu muosel buc in stil da baghegiar, mobein ina metoda.» E Gion A. Caminada muossa la forza dil liug che pretendia digl architect giuven sensibilidat, intellectualidat e vesta virtuala. «Senti la forza dil liug, ils potenzials per il niev, senti era quei ch'ins vesa buc e sviluppei lu il baghetg» ei siu cussegl als architects digl avegnir. Plinavon giavischa el ch'ils architects realiseschien in object che biars el liug sappien profitar da quel. Cun quei manegia il purtader dil premi da cultura buca sulet ils possessurs, mobein il generalesser. «Igl architect astga buca haver in maletg digl object avon ch'el enconuscha il liug. El sto capir il cuntegn dil liug e sviluppar ina idea concentrada sil liug.» Quei munti era la concentraziun dil material disponibel. En siu agen vitg ha Gion A. Caminada realisau ina part da sias finamiras. Avon in onn ha Vrin retschert il Premi europeic pil svilup integral e persistent. Vrin ei daventau in center dall'architettura. Ils baghetgs digl architect indigen dattan buc adina en egl. Quei ei intenziun.

Scaffir loghens

Il professer d'architettura s'engascha buca politic. Politics ei denton siu patertgar ed era sia lavur ei politica. «Scaffir loghens» ei buca sulet ina disciplina dall'architettura. Gion A. Caminada numna ei ina mischeida denter scienza, politica, economia ed ecologia. «Nus astgein buca sesviluppar mo en ina direcziun», fa el attent e numna in exempel actual: «En Lumnezia vegni risdau actualmein cuntravers d'ina cuntrada turistica e d'ina cuntrada d'implonts ero-electrics. Jeu vi in spazi da viver d'aula qualitat.» Enteifer quel stoppien ils interess esser reparti, naven d'in svilup turistic tier implonts d'energia ed auters. Ins meini savens ina discussiun pro e contra. Quei scaffeschi preits. «Ins sto plitost definir ina maxima ch'ins giavischa e lu intercurir pusseivladads da realisar quella.»

«L'architettura ei in tema medial», conceda igl architect premiau. Ils architects stars leventien igl interess e quei hagi duas varts. Pli bugen ch'in architect star vul Gion A. Caminada esser in architect autonom. «Esser perschuadius da contonscher igl ideal», numna el igl impuls, ei denton perschuadius ch'ins hagi disgiu cartent da haver contonschiu igl ideal. «Giacometti ha adina giu la speranza da formar la figura ideala ed igl ei ord sia veta buca reussiu. Igl impuls ha denton schau nescher in scheni.» Era Gion A. Caminada ha meinsvart dubis. «Sch'ins ha dubis, lavuran ins vid sesez. Ils dubis ein in partenari dalla veta.» Ed el mida tiel lungatg tudestg: «Zweifeln, aber nicht verzweifeln.»



L'Ustria Steila a Siat ei in dils projects novs digl architect da Vrin.



La camona dil Terri cun crappa dil contuorn ei punct da partenza per biars visitaders dalla Greina.



Ina tuor creada da Gion A. Caminada duei embellir il delta dalla Reuss.